

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma chu Tamil Nadu-a awm Karunya Institutes of Technology & Sciences (Deemed to be University) chuan Honorary Doctorate Degree an hlan.
- 2. Mizoram Universal Health Care Scheme (MUHCS) hnuaia inziak lut mi 14266 an awm tawh.
- 3. Zokhawthar bul, Myanmar ram hmun hrang hrang atanga Zokhawthara sahimna zawnga rawn raltlan te chu nimin khan an mahni ram lamah an kir leh ta.
- 4. Nimin khan Rozgaar Mela vawi 16-na, ram tana thalaite eizawнна pekna hun hman a ni.

<><><>

CM

Chief Minister Pu Lalduhoma chu Tamil Nadu-a awm Karunya Institutes of Technology & Sciences (Deemed to be University) chuan Honorary Doctorate Degree an hlan.

Executive Council of Karunya Institute of Technology & Sciences (Deemed to be University) chuan, Pu Lalduhoma chu hmingtha taka khawtlang rawng a bawl thinna te, hmathlir tha tak nei ram hruaitu a nih vang te, remna leh muanna a awm theih nana nghing lo va a inpek thinna te, hmasawнна leh mipui sawrkar dinna kawnga a hnathawh tha tak tak te avangin Doctor of Letters (Honoris Causa) a hla niin a sawi.

Nimin khan Pu Lalduhawma hian Deemed to be University te hi an Convocation vawi 31 chu a hman pui a, Honorary Doctorate Degree an pek chu an rawng a bawlsak mek Mizoram, ziaak leh chhiar thiam vek te chenna (fully literate state) ram mipuite aiawhin a dawng tih a sawi a. Zirnain hmasawнна leh changkanna a thlen zel a ni tih lantirnaah a ngaih thu sawiin Doctor of Letters an hlan avangin lawmthu a hrilh a ni.

Chief Minister chuan, India rama zirna in tha tam tak chu Kristian te din leh enkawl an ni a ti a. Zirna te, hriselna te, hnuchham enkawlна leh khawtlang rawngbawlна kawng dangah pawh, ram pum huapa mipui awm zat atanga tehin tlem hle mah ila, ringtute hian an thawhhlawk thin niin a sawi. Karunya University pawh chutiang rilru pu chung a din leh kalpui a ni a. India chhim lama University tha leh changtlung pawl tak a ni chho ta hial a. Ramin kan hlawkpui em em a ni, a ti.



**MUHCS**

Mizoram Universal Health Care Scheme (MUHCS) hnuaia inziak lut mi 14266 an awm tawh a, inziaklut zingah hian 12533 hi General (Rs 2500) hnuaia in ziaklut niin, 1128 chu Standard (Rs 5000) hnuaia ziah luh an ni a, Premium (Rs 10,000) hnuaiah inziak lut hi mi 605 an bawk.

Sawrkar chhinchhiah danin inziak lut te hi - Aizawl East, Aizawl West, Champhai, Kolasib, Lawngtlai, Lunglei, Mamit, Serchhip leh Siaha District atanga inziaklut te an ni a, MUHCHS inziah luhna (Registration) atana sum lut hi a vaiin cheng nuai 430 (Rs 4,30,22,500) a ni.

MUHCS hnuaia inziak lut zingah Aizawl East atanga inziak lut tam berin mi 4276 an in ziaak lut a, hetihlai hian Mamit district atanga inziaklut mi 194 chauh awmin inziah luh tlemna ber District a ni.

MUHCS inziah luh hi kalpui chhonzawm zel niin thla thar August atanga inziak lut duh tan a man let khata tam chawi in a inziah luh theih dawn a, General plan Rs 2500 ni thin chu Rs 5000 ni tawhin Standard (Rs 5000) chu Rs 10000 a ni tawh dawn a, Premium (Rs 10,000) pawh Rs 20,000 a ni tawh dawn a ni.



**MYANMAR REFUGEE**

Zokhawthar YMA hruaitu te hnen atanga Akashvani thu dawn danin, tun hnaia Zokhawthar bul, Myanmar ram hmun hrang hrang atanga Zokhawthara sahimna zawnga rawn raltlan te chu nimin khan an mahni ram lamah an kir leh ta a ni.

Hetihlai hian Hualngo People Organisation hruaitute leh Tiau Khawmawi hruaitute chuan, Chin National Defence Force sipaite'n Khawmawia In an rawk leh bungrua bakah pawisa an rukte in report turin mipui an hriattir a, hemi dungzui hian Khawmawi mipuiten harsatna an tawh dante an report a. Nimin lai dar 3:00 thlenga report a alan dan chuan Khawmawiah In 12 rawk niin India pawisa Cheng Nuai 19.1; Myanmar Kyat (Chiat) Nuai 289; 125 Kenbo Bike 21 rukbo niin Khawmawi leh Rihkhawdar a CNDF te sulhnu hi la chhui zui zel a ni.

Myanmar atanga Zokhawthara rawn raltlan mi 3525 te chu nimin chawhnu khan an mahni In lum lamah an kir leh ta a, Zokhawthara Police te hriatpuina in heng mite hi an ram lamah him takin an kir a, Khawmawi boruak pawh a pangngai chho tanin Hualngoram Sipai CNF Mizorama rawn ralktlan te pawh an ram lamah an kir leh tawh a ni. Hetihlai hian Vaphai leh Saikhumphai a Myanmar raltlan te chu an ram lamah kir lovin an la awm rih a, nimin tlai thleng khan ramriah silai ri hriattur a awm rih lo.



**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



**GOSPEL CAMPING**

Mizoram Sorkar, Tlawmngai Pawl leh Kohhran tangkawp in Neihbawiha Synod Revival Camping Cente-a an buatsaih Hulhliap chu nimin khan a thawh khatna zawh a ni.

Ni 20 chhung awh Hulhliap Program-ah hian mumal taka ruihhlo avanga harsatna tawh te enkawl niin, a buaipuitu Core Committee Chairman Pu Malsawmzuala Ralte leh Secretary Pi Lalhriatzuali Ralte ten a hmun atang hian camp chhuakte an han thlah a. Mahni chhungte lamtu nei lo chu an kal tanna Bawngkawn YMA Hall leh Central YMA Office ah te phurh thlen leh niin heta tang hian a then an chhungten an lam a, a then mahni in an haw leh a ni. Central YMA Office-ah hian SW&WCD Minister Pi Lalrinpuii pawhin lo hmuakin kawmna hun leh fuihna huntha tak a hmang.

Camper hi a tawp thlengin mipa 105 leh hmeichhia 14 an awm a. Tuna camp chhuakte hi anmahni duhthu in PISGAH Reformatory Center, Thingsulthliah-ah mipa 2 leh Shakti Sadan, Maumualah hmeichhia 1 an lut a. A bak zawng hi mahni ina lamah an haw a ni.

Hulhliap Program hi camp chhuak in a hawte tan la chhun zawm niin After Care Follow-up, Psycho-Social Counselling hmangin volunteer Psychologist leh Social Worker mi 40 rualin an vil zui ang a, thla 3 chhung a tul angin an enzui dawn a ni. Sorkar ruahman dan chuan hemi atanga damna change tan hian After Care Skill Training leh Handholding te tih chhunzawm tum a ni a. Hetiang tihna tur hmun remchang hi dap mek a ni.

<><><>

**CM**

Delhi-a cham mek Chief Minister Pu Lalduhoma leh Department of Public Enterprises Secretary K. Moses Chalai te chu tun hnai khan Mizoram House-ah an inkawm a, CSR sum hailuh kawnga Mizoram hmasawnna tur te an sawi dun.

Chief Minister chuan Northeast State te pual bika CSR sum 10% dah hrang tura rawtna Union Finance Minister hnenah an thlen tawh thu a lo hrilh a, Secretary pawh hian Mizoramin CSR tam zawk a hailuh theihna turin theihtawp a lo chhuahpui zel tur thu a hrilhin Union Finance Secretary pawhin hemi chungchang hi a lo sawipui tawh thu a sawi a ni.

NEC Secretary a nih lai a Mizoram tan a project a bikin a bial tan a sanction te avangin Chief Minister hian lawmthu a hrilh a ni.

<><><>

**ROZGAR MELA**

Nimin khan Rozgaar Mela vawi 16-na, ram tana thalaite eizawwna pekna hun hman a ni a. He job fair neih chhung hian Prime Minister Narendra Modi chuan sorkar department leh pawl hrang hranga hnathawk tharte hnenah appointment letter nuai 51 chuang a sem a ni. Biakhmuhtheihna kaltlanga ruat tharte a biaknaah PM Modi chuan lawmpuina a hlan a, sorkarin Rozgar Mela a hmalakna avang hian thalai nuai tam takin Central sorkarah hna nghet an hmu tawh tih a sawi. Prime Minister chuan heng thalai te hian tunah hian ram thanna kawngah hmun pawimawh tak an chang a, Viksit Bharat dinna kawngah pawh a hma hruaitu an ni tih a sawi bawk. He hmalakna atan hian Centre chuan cheng vaibelchhe nuai khat vel budget a ruahman a, hei hian hna vaibelchhe 3 leh nuai 50 vel a siam theih beisei a ni.

Akashvani correspondent te chuan, Rozgar Mela vawi 16-na hi ram pumah hmun 47-ah neih a ni an ti a. Mi thar lak tharte hian Ministry leh Department hrang hrangah Central Sorkar an zawm dawn a, chung zingah chuan Ministry of Railways, Department of Revenue, Ministry of Personnel, Public Grievances and Pensions, Ministry of Home Affairs, Department of Posts, Department of Higher Education bakah Ministry of Labour and Employment bakah a dangte an tel dawn a ni.

<><><>

**Wimbledon**

Center Court, London-a inkhelah 6-0, 6-0 a hnehna changin world No.4 Iga Swiatek chu Wimbledon hmeichhe singles champion a ni. Inkhel hi minute 57 chauh a ni a, Open Era-a hmeichhe final-a game hloh lo a champion hmasa ber a ni a. Swiatek hian Wimbledon title a lak hmasak ber a ni a, Grand Slam bikah a vawi ruk champion-na a ni bawk. Grand Slam-a match vawi 100 a chakna a ni bawk a, Polish player zingah Wimbledon singles title la thei hmasa ber a ni bawk.

<><><>